

22
3

護法論

張人傑題



護法論元序

天下無二道。聖人無兩心。蓋道者。先天地生。亙古今而常存。聖人得道之真。以治身。其緒餘土苴。以治天下國家。豈不大哉。故聖人或生於中國。或生於西方。或生於東夷。西夷。生雖殊方。其得道之真。若合符契。未始殊也。佛者。生於西方。得道之真。以治身。以寂滅爲樂者也。自得於妙。有真空圓明廣大。不可思議。孔子以謂佛爲西方聖人。孔子聖人也。爲萬世之師。豈虛語哉。其尊敬如此。學者學孔子者也。孔子之言不信。反生謗斥。與斥孔子何異。此皆非吾徒也。無盡居士。深造大道之淵源。洞鑒儒釋之不二。痛夫俗學之蔽蒙。不悟自己之真性。在日用之間。顛倒妄想。不得其門而入。深懷憤嫉。搖唇鼓舌。專以斥佛爲能。自比孟子拒楊墨之功。俾後世稱之以爲聖人之徒。聾瞽學者。豈不欺心乎。欺心。乃欺天也。則護法之論。豈得已哉。觀其議論勁正。取與嚴明。引證誠實。鋪陳詳備。明如皎日。信如四時。非胸中超脫。該貫至道之要妙。何以臻此。故能釋天下之疑。息天下之謗。實後學之標準也。孟子曰。盡其心者。知其

性。知其性則知其天。與佛所謂直指人心見性成佛。無以異矣。佛以戒定慧爲入道之大要。吾儒所謂懲忿窒慾則戒也。寂然不動則定也。感而遂通天下之故則慧也。三者儒釋豈不相同。蓋方冊所載。皆古人之糟粕。若誦糟粕而不識聖人之旨要。與面牆者何異哉。杏壇三千之衆。得夫子之道者。顏子一人而已。尙未達一間。靈山百萬徒衆。悟玄機者。迦葉一人而已。況望聖人數千載之間。聞其風。讀其書。咸欲造聖人之域。不亦難乎。宜其邪說橫議興焉。則護法之論。確乎不可拔也。

乾道辛卯六月望日無礙居士南澗鄭興德與撰




3 0466 7516 5

護法論

宋丞相無盡居士張商英述

孔子曰。朝聞道。夕死可矣。以仁義忠信爲道耶。則孔子固有仁義忠信矣。以道爲道耶。則曰夕死可矣。是果求聞何道哉。豈非大覺慈尊。識心見性。無上菩提之道也。不然。則列子何以謂孔子曰。丘聞西方有大聖人。不治而不亂。不言而自信。不化而自行。蕩蕩乎。民無能名焉。列子學孔子者也。而遽述此說。信不誣矣。孔子。聖人也。尙尊其道。而今之學孔子者。未讀百十卷之書。先以排佛爲急務者。何也。豈獨孔子尊其道哉。至於上下神祇。無不宗奉。矧茲凡夫。輒恣毀斥。自昧己靈。可不哀歎。韓愈曰。夫爲史者。不有人禍。則有天刑。豈可不畏懼而輕爲之哉。蓋爲史者。採摭人之實迹。尙有刑禍。況無故輕薄。以毀大聖人哉。且茲人也。無量劫來。沈淪諸趣。乘少善力。而得此身。壽夭未定也。縱及耳順。從心之年。亦暫寄人間耳。以善根微劣。不能親炙究竟其道。須臾老之將至。爲虛生浪死之人。自可悲痛。何暇更縱無明業識。造



端倡始。誘引後世。闡提之黨。背覺合塵。同入惡道。罪萃厥身。可不慎哉。且佛何求於世。但以慈悲廣大。願力深重。哀見一切衆生。往來六道。受種種苦。無有已時。故從兜率天宮。示現淨飯國王之家。爲第一太子。道德文武。端嚴殊特。於聖人中。而所未有。於弱冠之年。棄金輪寶位。出家修道。成等正覺。爲天人師。隨機演說三乘五教。未後以正法眼藏。涅槃妙心。付囑摩訶迦葉。爲教外別傳。更相傳授。接上根輩。故我本朝太宗皇帝之序金剛般若也。則曰。歎不修之業溥。傷強執之愚迷。非下士之所知。豈淺識之能究。大哉聖人之言。深可信服。一從佛法東播之後。大藏教乘。無處不有。故余嘗謂欲排其教。則當盡讀其書。深求其理。撫其不合吾儒者。與學佛之見。折疑辨惑。而後排之可也。今不通其理。而妄排之。則是斥鷃笑鴟鵬。朝菌輕松柏耳。歐陽修曰。佛者善施無驗不實之事。蓋亦未之思耳。嘗原人之造妄者。豈其心哉。誠以朋急饑寒。苟免患難而已。佛者捨其至貴極富。爲道忘身。非饑寒之急。無患難可免。其施妄也。何所圖哉。若以造妄垂裕其徒。凡夫尙知我躬不閱。遑恤我後。而佛豈不知耶。

古今世人。有稍挾欺給者。必爲衆人所棄。況有識之賢者乎。若使佛有纖毫安心。則安能俾其佛教。綿亙千古。周市十方。天龍神鬼。無不傾心。菩薩羅漢。更相弘化。試此論之。有詐妄心者。求信於卑凡下愚。尙不可得。況能攝伏於具神通之聖人哉。經云。如來是真語者。實語者。如語者。不誑語者。不異語者。又云。諸佛如來。無妄語者。信哉。斯言。明如皎日。孟子曰。誦堯之言。行堯之行。是堯而已矣。余則曰。誦佛之言。行佛之行。是佛而已矣。何慊乎哉。佛祖修行。入道蹊徑。其捷如此。而人反以爲難。深可閔悼。撮其樞要。戒定慧而已。若能持戒。決定不落三塗。若能定力。決定功超六欲。若能定慧圓明。則達佛知見。入大乘位矣。何難之有哉。詩云。德輶如毛。民鮮克舉之。其是之謂乎。韓愈與大顛論議。往復數千言。卒爲大顛一問曰。公自揣量學問知識。能如晉之佛圖澄乎。能如姚秦之羅什乎。能如蕭梁之寶誌乎。愈曰。吾於斯人。則不如矣。大顛曰。公不如彼明矣。而彼之所從事者。子以爲非。何也。愈不能加答。其天下之公言乎。佛豈妨人世務哉。金剛般若云。是故如來說一切法。皆是佛法。維摩經偈云。經書

呪禁術。工巧諸伎藝。盡現行此事。饒益諸羣生。法華經云。資生業等。皆順正法。傅大士。龐道玄。豈無妻子哉。若也。身處塵勞。心常清淨。則便能轉識爲智。猶如握土成金。一切煩惱。皆是菩提。一切世法。無非佛法。若能如是。則爲在家菩薩。了事凡夫矣。豈不偉哉。歐陽修曰。佛爲中國大患。何言之甚歟。豈不爾思。凡有害於人者。奚不爲人所厭。而天誅哉。安能深根固蒂於天下也。桀紂爲中國天子。害跡一彰。而天下後世共怨之。況佛遠方上古之人也。但載空言。傳於此土。人天向化。若偃風之草。苟非大善大慧。大利益。大因緣。以感格人天之心者。疇克爾耶。一切重罪。皆可懺悔。謗佛法罪。不可懺悔。誠哉是言也。謗佛法。則是自昧其心耳。其心自昧。則猶破瓦不復。完灰不重木矣。可懺悔哉。佛言。唯有流通佛法。是報佛恩。今之浮圖。雖千百中。無一能髣髴古人者。豈佛法之罪也。其人之罪。雖然如是。禮非玉帛。而不表樂。非鐘鼓。而不傳。非藉其徒。以守其法。則佛法殆將泯絕無聞矣。續佛壽命。何賴焉。濫其形服者。誅之。自有鬼神矣。警之。自有果報矣。威之。自有刑憲矣。律之。自有規矩矣。吾輩何與焉。然

則是言也。余至於此。卒存二說。蘇子瞻嘗謂余曰。釋氏之徒。諸佛教法所繫。不可以庶俗待之。或有事至庭下。則吾徒當以付囑流通爲念。與之闊略可也。又曾逢原作郡時。釋氏有訟者。閱實其罪。必罰無赦。或有勉之者。則曰。佛法委在國王大臣。若不罰一戒百。則惡者滋多。當今之世。欲整齊之。捨我輩其誰乎。余考二公之言。則逢原所得多矣。其有不善者。誠可惡也。豈不念皇恩度牒。不與征役者。人主之惠哉。豈不念古語有云。一子出家。九族生天哉。豈不念辭親棄俗。當爲何事哉。豈不念光陰易往。而道業難成哉。豈不念道眼未明。而四恩難報哉。豈不念行業不修。而濫膺恭敬哉。豈不念道非我修。而誰修哉。豈不念正法將墜。而魔法增熾哉。蓋昔無著遇文殊時。已有凡聖同居。龍蛇混雜之說。況今去聖逾遠。求其純一也。不亦難乎。然念大法所寄。譬猶披沙揀金。裏石攻玉。縱於十斛之沙。得粒金。一山之石。得寸玉。尙可以爲世珍寶也。非特學佛之徒爲然。孔子之時。已分君子儒。小人儒矣。況茲後世。服儒服者。豈皆孔孟顏閔者哉。雖曰學者求爲君子。安能保其皆爲君子耶。歷觀自古巨盜。

姦臣強叛猾逆。率多高才博學之士。豈先王聖教之罪歟。豈經史之不善歟。由此喻之。末法像教之僧。敗羣不律者。勢所未免也。韓愈曰。佛者夷狄之一法耳。自後漢時流入中國。上古未曾有也。自黃帝已下。文武已上。舉皆不下百歲。後世事佛漸謹。年代尤促。陋哉。愈之自欺也。愈豈不聞孟子曰。舜生於諸馮。遷於負夏。卒於鳴條。東夷之人也。文王生於岐周。卒於畢郢。西夷之人也。舜與文王皆聖人也。爲法於天下。後世安可夷其人。廢其法乎。況佛以淨飯國王爲南瞻部洲之中。而非夷也。若以上古未嘗有而不可行。則蚩尤瞽瞍。生於上古。周公仲尼。生於後世。豈可捨衰周之聖賢。而取上古之凶頑哉。而又上古野處穴居。茹毛飲血。而上棟下宇。鑽燧改火之法。起於後世者。皆不足用也。若謂上古壽考。而後世事佛漸謹。而年代尤促者。竊鈴掩耳之論也。愈豈不知外丙二年。仲壬四年之事乎。豈不知孔鯉。顏淵。冉伯牛之夭乎。又書無逸曰。自時厥後。亦罔或克壽。或十年。或七八年。或五六年。或四三年。彼時此方。未聞佛法之名。自漢明佛法至此之後。二祖大師百單七歲。安國師百二十八歲。趙

州和尚一百二十甲子。豈佛法之咎也。又曰。如彼言可憑。則臣家族合至灰滅。此亦自蔽之甚也。佛者。大慈大悲。大喜大捨。自他無間。怨親等觀。如提婆達多種種侵害於佛。而終憐之。受記作佛。而後世若求喜怒禍福以爲靈。則是邀祭祀之小小鬼神矣。安得謂之大慈悲之父乎。世間度量之人。尙能遇物有容。犯而不校。況心包太虛。量廓沙界之聖人哉。信與不信。何加損焉。佛者。如大醫王。善施法藥。有疾者。信而服之。其疾必瘳。其不信者。蓋自棄耳。豈醫王之咎哉。夏蟲不可語冰霜。井蛙不可語東海。吾於韓愈見之矣。若謂事佛促壽。則毀佛者合當永壽。後世之人。排佛者固多矣。士庶不足道也。如唐武宗會昌五年。八月下旬廢教。至六年三月初纔及半年而崩者。此又何也。如唐李白。杜甫。盧仝。李翱之輩。韓愈亦自知其不及矣。然諸子亦未嘗排佛。亦不失高名也。衆人之情。莫不好同而惡異。是此而非彼。且世之所悅者。紛華適意之事。釋之所習者。簡靜息心之法。此其所以相違於世也。諸有智者。當察其理之所勝。道之所在。又安可不原彼此之是非乎。林下之人。食息禪燕。所守規模。皆佛

祖法式。古今依而行之。舉皆證聖成道。每見譏於世者。不合俗流故也。佛之爲法。甚公而至廣。又豈止緇衣祝髮者得私爲哉。故唐相裴公美序華嚴法界觀云。世尊初成正覺。歎曰。奇哉。一切衆生。具有如來智慧德相。但以妄想執著。而不證得。於是稱法界性。說華嚴經。佛之隨機接引。故多開遮權變。不可執一求也。歐陽永叔曰。無佛之世。詩書雅頌之聲。其民蒙福如此。永叔好同惡異之心。是則是矣。然不能通方遠慮。何其隘哉。若必以結繩之政。施之於今可乎。殊不知天下之理。物希則貴。若使世人舉皆爲儒。則孰不期榮。孰不謀祿。期謀者衆。則爭競起。爭競起。則妬忌生。妬忌生。則褒貶勝。褒貶勝。則讎怨作。讎怨作。則擠陷多。擠陷多。則不肖之心。無所不至矣。不肖之心。無所不至。則爲儒亦不足爲貴矣。非特儒者爲不足貴也。士風如此。則求天下之治也。亦難矣。佛以其法付囑國王大臣。不敢自專也。欲使其後世之徒。無威勢以自尊。隆道德以爲尊。無爵祿以自活。依教法以求活。乞食於衆者。使其折伏。憍慢下心於一切衆生。又維摩經。佛令迦葉前往問疾。迦葉憶念昔於貧里而行乞食。時

維摩詰來謂我言。唯大迦葉。有慈悲心。而不能普。捨豪富。從貧乞也。肇法師註云。迦葉以貧人。昔不植福。放生貧里。若今不積善。後復彌甚。愍其長苦。故多就乞食。又曰。見來求者。爲善師想。什法師註云。本無施意。因彼來求。發我施心。則爲我師。故爲善師想也。不畜妻子者。使其事簡累輕。道業易成也。易其形服者。使其遠離塵垢。而時以自警也。惜乎竊食其門者。志願衰劣。不能企及古人。良可歎也。且導民善世。莫盛乎教。窮理盡性。莫極乎道。彼依教行道。求至乎涅槃者。以此報恩德。以此資君親。不亦至乎。故後世聖君。爲之建寺宇。置田園。不忘付囑。使其安心行道。隨方設化。名出四民之外。身處六和之中。其戒淨。則福蔭人天。其心真。則道同佛祖。原其所自之恩。皆吾君之賜也。苟能以禪律精修。於天地無媿。表率一切衆生。小則遷善遠罪。大則悟心證聖。上助無爲之化。密資難報之恩。則不謬爲如來弟子矣。苟違佛祖之戒。濫膺素殮。罪豈無歸乎。上世雖有三武之君。以徇邪惡。下臣之請。銳意翦除。旣廢之後。隨而愈興。猶霜風之肅物也。亦暫時矣。如冬後有春之譬。欲盡殲草木者。能使冬後

無春則可矣。苟知冬後有春。則何苦自當其惡。而彰彼爲善也。於己何益哉。余嘗觀
察其徒。中間有辭榮捨富者。俊爽聰明者。彼亦不知富貴可樂。春色可喜。肥鮮之甘。
車服之美。而甘心於幽深闐寂之處。藜羹韋布。僅免饑寒。縱未能大達其道。是必漸
有所自得者歟。議者深嫉其徒。不耕而食。亦人知其一。而莫知其他也。豈不詳觀通
都大邑。不耕而食者。十居七八。以至山林江海之上。草竊姦宄。市廛邸店之下。娼優
廝役。僻源邪徑之間。欺公負販。神祠廟宇之中。師童巫祀者。皆然也。何獨至於守護
心城者。而厭之哉。今戶籍之民。自犁鋤者。其亦幾何。釋氏有刀耕火種者。栽植林木
者。灌溉蔬果者。服田力穡者矣。豈獨今也。如古之地藏禪師。每自耕田。嘗有語云。諸
方說禪浩浩地。爭如我這裏種田博飯喫。百丈惟政禪師。命大衆開田曰。大衆爲老
僧開田。老僧爲大衆說法義。大智禪師曰。一日不作。一日不食。滄山曰。子可謂不虛過時光。
今夏作得箇什麼事。仰山曰。鋤得一片地。種得一畝粟。滄山曰。子可謂不虛過時光。
斷際禪師。每集大衆。栽松鑿茶。洞山聰禪師。常手植金剛嶺松。故今叢林普請之風。

尚存焉。釋氏雖衆，而各止一身。一粥一飯，補破遮寒，而其所費亦寡矣。且其既受國恩，紹隆三寶，而欲復使之爲農可乎？況其田園隨例常賦之外，復有院額科敷，官客往來，種種供給，歲之所出，猶愈於編民之多也。其於公私，何損之有？余嘗疾今官有勸農之虛名，而挾抑農之實患。且世之利用，苟有益者，不勸而人自趨矣。今背公營私者，侵漁不已，或奪其時，作不急之務，是抑之也。何勸之有？今游惰者十常七八，耕者十止二三。耕者雖少，若使常稔，則菽粟亦如水火矣。近歲或旱或潦，無歲無之。四方之稼，秀而不實者，歲常二三，甚者過半。亦豈爲耕者少而糧不足哉？老子曰：我無爲而民自富。苟無以致和氣而召豐年，雖多耕而奚以爲？歲之豐凶，繫乎世數。意其天理亦自有準量歟。歲常豐，穀愈賤，耕者愈少。此灼然之理。僧者，佛祖所自出也。有苦行者，有密行者。各人有三昧，隨分守常德。孜孜於戒律，念念在定慧。能捨人之所難捨，能行人之所不能行。外富貴若浮雲，視色聲如谷響。求道則期大悟，而後已。惠物則念衆生而不忘。今厭僧者，其厭佛祖乎？佛以持戒當行孝，不殺不盜不淫不妄。

不茹葷酒。以此自利利他。則仁及含靈耳。又豈現世父母哉。蓋念一切衆生。無量劫來。皆曾爲己父母宗親。故等之以慈。而舉期解脫。以此爲孝。不亦優乎。且聰明不能敵業。富貴豈免輪迴。銅山奚補於餒亡。金穴靡聞於長守。余忝高甲之第。仕至聖朝宰相。其於世俗名利。何慊乎哉。拳拳繫念於此者。爲其有自得於無窮之樂也。重念人生幻化。不啻浮泡之起滅。於茲五蘊完全之時。而不聞道。可不惜哉。若世間更有妙道。可以印吾自肯之心。過真如涅槃者。吾豈不能捨此而趨彼耶。惡貧欲富。畏死欣生。飲食男女。田園貨殖之事。人皆知之。君子不貴也。所貴也者。無上妙道也。或謂余曰。僧者。毀形遁世之人。而子助之何多哉。余曰。余所存誠者。佛祖遺風矣。豈恤乎他哉。子豈不聞孟子言人少則慕父母。知好色則慕少艾。孰謂巾髮而娶者。必爲孝子賢人。今世俗之間。博奕飲酒。好勇鬪狠。以危父母者。比比皆是也。又安可相形而不論心哉。前輩有作無佛論者。何自蔽之甚也。今夫日月星辰。雷霆風雨。昭昭然在人耳目。豈無主張者乎。名山大川。神祇廟貌。可謂無乎。世間邪精魍魎。小小鬼神。猶

尙恪然信其是有。何獨至於佛而疑之。曠大劫來。修難行苦行。成等正覺。爲聖中至聖人。天法王。明極法身。充滿沙界。而謂之無可乎哉。大集經云。商主天子。問佛在世之日。有所供養。世尊是受者。而施者獲福。世尊滅後。供養形像。誰爲受者。佛言。諸佛如來。法身也。若在世。若滅後。所有供養。其福無異。華嚴亦云。佛以法爲身。清淨如虛空。雖然。諸佛而名其道。蓋善權方便。接引之門耳。若必謂之無。則落空見外道。斷見外道。自昧自棄。可悲也矣。如雲門大師云。我當時若見一棒打殺與狗子喫者。此大乘先覺之人。解粘去縛。遣疑破執而已。豈初學者可躡等哉。此可與智者道。不可與愚者語。其教之興也。恢弘之則有具神通之聖人。信向之則有大根器之賢哲。以至天地鬼神之靈。無不景慕。豈徒然哉。大抵所尙必從其類。擬之必從其倫。般若正知。菩提真見。豈凡庸之人。所能睥睨哉。故同安察云。三賢尙未明斯旨。十聖那能達此宗。緣覺辟支四果聲聞。尙不與其列。況其下者乎。在聖則爲大乘菩薩。在天則爲帝釋梵王。在人則爲帝王公侯。上根大器。功成名遂者。在僧俗中亦必宿有靈骨。負逸

羣超世之量者。方能透徹。故古德云。聞而不信。尙結佛種之因。學而未成。猶益人天之福。惜乎愚者昧而不能學。慧者疑而不能至。間有世智辯聰者。必爲功名所誘。思日競辰。焚膏繼晷。皇皇汲汲。然涉獵六經子史。急目前之應對。尙且不給。何暇分陰及此哉。或有成名仕路者。功名汨其慮。富貴蕩其心。反以此道爲不急。罔然置而不問。不覺光陰有限。老死忽至。臨危湊亟。雖悔奚追。世有大道遠理之如此也。而不窺其涯涘者。媿於古聖賢多矣。旣不聞道。則必流浪生死。散入諸趣。而昧者甘心焉。是誰之過歟。嵩嶽珪禪師云。佛有三能三不能。佛能空一切相。成萬法智。而不能卽滅定業。佛能知羣有性。窮億劫事。而不能化導無緣。佛能度一切有情。而不能盡衆生界。是謂三能三不能也。今有心憤憤。口悻悻。聞佛似寇讎。見僧如蛇虺者。吾未如之何也已矣。且佛尙不能化導無緣。吾如彼何哉。議者皆謂梁武奉佛而亡國。蓋不探佛理者。未足與議也。國祚之短長。世數之治亂。我不知其然矣。堯舜大聖而國止一身。其禪位者。以其子之不肖而後禪也。其子之不肖。豈天罪之歟。自開闢至漢明帝

以前佛法未至於此。而國有遇難者。何也。唐張燕公所記梁朝四公者。能知天地鬼神變化之事。了如指掌。而昭明太子亦聖人之徒也。且聖者以治國治天下爲緒餘耳。豈無先覺之明。而慎擇可行之事。以告武帝哉。蓋定業不可逃矣。嗚呼。定業之不可作也。猶水火之不可入也。其報之來。若四時之無爽也。如西土師子尊者。此土二祖大師。皆不免也。又豈直師子二祖哉。釋迦如來。尙且不免金鏘馬麥之報。況初學凡夫哉。蓋修也者。改往修來矣。且宿業既還已。則將來之善。豈捨我哉。今夫爲女形者。實劣於男矣。遽欲奉佛而可亟變爲男子乎。必將盡此報身。而願力有待於來世乎。梁武壽高九十。不爲不多。以疾而卒。不至大惡。但捨身之謬。以其先見禍兆。筮得乾卦上九之變。取其貴而無位。高而無民。以此自卑。欲圖弭災召福者。梁武自謬爾。於佛何有哉。梁武小乘根器。專信有爲之果。茲其所以不遇達磨之大法也。過信泥跡。執中無權者。亦其定業使之然乎。但聖人創法。本爲天下後世。豈爲一人設也。孔子曰。仁者壽。而力稱回之爲仁。而回且夭矣。豈孔子之言無驗歟。蓋非爲一人而言。

也。梁武之奉佛。其類同之爲仁乎。侯景兵至。而集沙門念摩訶般若波羅蜜者。過信泥跡。而不能權宜適變也。亦猶後漢向詡。張角作亂。詡上便宜。頗多譏刺。左右不欲國家興兵。但追將兵於河上。北向讀孝經。則賊當自消滅。又如後漢蓋勳傳。中平元年。北地羌胡與邊章等寇隴右。扶風宋梟爲守。患多寇叛。謂勳曰。涼州寡於學術。故屢多反暴。今欲多寫孝經。令家家習之。庶或使人知義。此亦用之者不善也。豈孝經之罪歟。抑又安知武帝前定之業。禍不止此。由作善以損之。故能使若是之壽也。帝嘗以社稷存亡久近。問於誌公。公自指其咽示之。蓋識侯景也。公臨滅時。武帝又復詢詰前事。誌公曰。貧僧塔壞。陛下社稷隨壞。公滅後。奉勅造塔已畢。武帝忽思曰。木塔其能久乎。遂命撤去。改創以石塔。貴圖不朽。以應其記。拆塔纔畢。侯景兵已入矣。至人豈不前知耶。如安世高。帛法祖之徒。故來畢前世之對。不遠千里。自投死地者。以其定業不可逃也。如晉郭璞。亦自知其不免。況識破虛幻。視死如歸者乎。豈有明知宿有所負。而欲使之避拒苟免哉。歐陽永叔跋萬回神跡記碑曰。世傳道士罵

老子云。佛以神怪禍福。恐動世人。俾皆信向。故僧尼得享豐饒。而我老子高談清淨。遂使我曹寂寞。此雖鄙語。有足采也。永叔之是其說也。亦小有才。而未達通方之大道者歟。不揣其本之如此也。神怪禍福之事。何世無之。但儒者之。言。文。而略耳。又況眞學佛者。豈以溫飽爲志哉。本以求無上善。提出世間之大法耳。且道士是亦棄俗人也。若以出家求道。則不以寂寞爲怨。若以圖舖啜爲心。則不求出離。不念因果。世間萬途。何所不可哉。或爲胥徒。或習醫卜。百工技藝。屠沽負販。皆可爲也。棄此取彼。孰禦焉。唐太宗方四歲時。已有神人見之。曰。龍鳳之姿。天日之表。必能濟世安民。及其未冠也。果然建大功業。亦可謂大有爲之君矣。歐陽修但一書生耳。其修唐書也。以私意臆說。妄行褒貶。比太宗爲中才庸主。而後世從而和之。無敢議其非者。嗚呼。學者隨世高下。而歐陽修獨得專美於前。誠可歎也。作史者固當其文直。其事核。不虛美。不隱惡。故謂之實錄。而修之編史也。唐之公卿好道者甚多。其與禪衲游。有機緣事跡者。舉皆削之。及其致仕也。以六一居士而自稱。何也。以居士自稱。則知有佛。

矣。知有而排之。則是好名而欺心耳。豈爲端人正士乎。今之恣排佛以沽名者亦多矣。如唐柳子厚移書韓退之。不須力排二教。而退之集無答子厚書者。豈非韓公知其言之當而默從之。故不復與之辯論也。近世王逢原作補書。鄙哉。逢原但一孤寒庸生耳。何區區闡提之甚也。退之豈不能作一書。而待後人補也。其不知量也如此。蓋漢唐以來。帝王公侯奉佛者。不可勝計也。豈害其爲賢聖哉。余嘗謂歐陽修曰。道先王之言。而作罷訟匹夫之見。今匿人之善。偏求其短。以攻刺之者。罷訟匹夫也。公論天下後世之事者。可如是乎。甚哉。歐陽修之自蔽也。而欲蔽於人。又欲蔽天下後世。幸其私臆之流言。終必止於智者。雖見笑於通方博古之士。而未免誘惑於躁進狂生耳。如斯人也。使之侍君。則佞其君。絕佛種性。斷佛慧命。與之爲友。則導其友。戕賊真性。奔競虛名。終身不過爲一聰明凡夫矣。其如後世惡道何。修乎修乎。將謂世間更不別有至道妙理。止乎如此緣飾些小文章而已。豈非莊生所謂河伯自多於水。而不知復有海乎。若也使其得志。則使後世之人。永不得聞曠劫難逢之教。超然

出世之法。豈不哀哉。岐人天之正路。瞎人天之正眼。昧因果之真教。澆定慧之淳風。無甚於修也。余嘗觀歐陽修之書尺。諫諫以憂煎。老病自悲。雖居富貴之地。戚戚然若無容者。觀其所出。皆真情也。其不通理性之明驗歟。由是念之。大哉真如圓頓之道。豈僻隘淺丈夫之境界哉。六道輪迴。三途果報。由自心造。實無別緣。謂彼三途六道自然。然而然者。何自棄之甚也。一失人身。悔將何及。三界萬法。非有無因而妄。招果苟不顧因果。則是自欺其心。自欺其心。則無所不至矣。近世伊川程顥。謂佛家所謂出世者。除是不在世界上行爲出世也。士大夫不知淵源。而論佛者。類如此也。殊不知色受想行識。世間法也。戒定慧解脫。解脫知見。出世間法也。學佛先覺之人。能成就通達。出世間法者。謂之出世也。稍類吾儒之及第者。謂之登龍折桂也。豈其真乘龍而握桂哉。佛祖應世。本爲羣生。亦猶吾教聖人。吉凶與民同患。五百年必有王者興。其間必有名世者。豈以不在世界上行爲是乎。超然自利而忘世者。豈大乘聖人之意哉。然雖如是。傷今不及見古也。可爲太息。古之出世。如青銅錢。萬選萬中。截瓊

枝寸寸是玉。析旃檀片片皆香。今則魚目混珠。薰蕕共囿。羊質虎皮者多矣。遂致玉石俱焚。古人三二十年。無頃刻間雜用身心。念念相應。如雞伏卵。尋師訪友。心心相契。印印相證。琢磨淘汰。淨盡無疑。晦跡韜光。陸沈於衆。道香果熟。諸聖推出。爲人天師。一言半句。耀古騰今。萬里同風。千車合轍。今則習口耳之學。裨販如來。披師子皮。作野干行。說時似悟。對境還迷。所守如塵俗之匹夫。略無媿恥。公行賄賂。密用請託。劫掠常住。交結權勢。佛法凋喪。大率緣此。得不爲爾寒心乎。余嘗愛本朝王文康公著大同論。謂儒道釋之教。沿淺至深。猶齊一變至於魯。魯一變至於道。誠確論也。余輒是而詳之。余謂羣生失真。迷性棄本。遂末者病也。三教之語。以驅其惑者。藥也。儒者使之求爲君子者。治皮膚之疾也。道書使之日損。損之又損者。治血脈之疾也。釋氏直指本根。不存枝葉者。治骨髓之疾也。其無信根者。膏肓之疾。不可救者也。儒者言性而佛見性。儒者勞心而佛者安心。儒者貪著而佛者解脫。儒者喧譁而佛者純靜。儒者尙勢而佛者忘懷。儒者爭權而佛者隨緣。儒者有爲而佛者無爲。儒者分別。

而佛者平等。儒者好惡。而佛者圓融。儒者望重。而佛者念輕。儒者求名。而佛者求道。儒者散亂。而佛者觀照。儒者治外。而佛者治內。儒者該博。而佛者簡易。儒者進求。而佛者休歇。不言儒者之無功也。亦靜躁之不同矣。老子曰。常無欲以觀其妙。猶是佛家金鎖之難也。同安察云。無心猶隔一重關。況著意以觀妙乎。老子曰。不見可欲。使心不亂。佛則雖見可欲。心亦不亂。故曰。利衰毀譽。稱譏苦樂。八法之風。不動如來。猶四風之吹。須彌也。老子曰。弱其志。佛則立大願力。老以玄牝爲天地之根。佛則曰。若人欲識佛境界。當淨其意如虛空。外無一法。而建立。法尙應捨。何況非法。老以抱一專氣。知止不殆。不爲而成。絕聖棄智。此則正是圓覺作止任滅之四病也。老曰。去彼取此。釋則圓同太虛。無欠無餘。良由取捨。所以不如。老曰。吾有大患。爲吾有身。文殊師利。則以身爲如來種。肇法師解云。凡夫沈淪諸趣。爲煩惱所蔽。進無寂滅之歡。退有生死之畏。故能發跡塵勞。標心無上。植根生死。而敷正覺之華。蓋幸得此身。而當勇猛精進。以成辦道果。如高原陸地。不生蓮華。卑溼淤泥。乃生此華。是故煩惱泥中。

乃有衆生起佛法耳。老曰：視之不見，名曰夷；聽之不聞，名曰希；釋則曰：離色求觀，非正見；離聲求聽，是邪聞。老曰：豫兮若冬涉川，猶兮若畏四鄰。釋則曰：隨流認得性，無喜亦無憂。老曰：智慧出，有大僞；佛則無礙清淨慧，皆從禪定生。以大智慧到彼岸。老曰：我獨若昏，我獨悶悶。楞嚴則以明極爲如來。三祖則曰：洞然明白。大智則曰：靈光獨耀，迴脫根塵。老曰：道之爲物也，唯恍唯惚，窈兮冥兮，其中有精。釋則務見諦明了，自肯自重。老曰：道法自然。楞伽則曰：前聖所知，轉相傳授。老曰：物壯則老，是謂非道。佛則一念普觀無量劫，無去無來亦無住，以謂道無古今，豈有壯老。人之幻身亦老也。豈謂少者是道，老者非道乎？老則堅欲去兵，佛則以一切法皆是佛法。老曰：道之出言，淡乎其無味。佛則云：信吾言者，猶如食蜜，中邊皆甜。老曰：上士聞道，勤而行之；中士聞道，若存若亡；下士聞道，大笑之。若宗據門中，則勤而行之，正是下士。爲他以上下之士，兩易其語。老曰：塞其兌，閉其門，釋則屬造作以爲者，敗執無者，又成落空。老欲去智愚民，復結繩而用之。佛則以智波羅蜜，變衆生業識爲方便智，換名不換。

體也。不謂老子無道也。亦淺與之不同耳。雖然。三教之書。各以其道。善世礪俗。猶鼎足之不可缺一也。若依孔子行事。爲名教君子。依老子行事。爲清虛善人。不失人天可也。若曰盡滅諸累。純其清淨本然之道。則吾不敢聞命矣。余嘗喻之。讀儒書者。則若趨炎附竈。而速富貴。讀佛書者。則若食苦嚙澀。而致神仙。其功如此。其効如彼。富貴者未死已前。溫飽而已。較之神仙。孰爲優劣哉。儒者但知孔孟之道。而排佛者。舜犬之謂也。舜家有犬。堯過其門而吠之。是犬也。非謂舜之善而堯之不善也。以其所常見者。舜而未常見者。堯也。吳書云。吳主孫權。問尙書令闕澤曰。孔丘老子。得與佛比對否。闕澤曰。若將孔老二家。比較佛法。遠之遠矣。所以然者。孔老設教。法天制用。不敢違天。諸佛說教。諸天奉行。不敢違佛。以此言之。實非比對明矣。吳主大悅。或曰。佛經不當誇示誦習之人。必獲功德。蓋不知諸佛如來。以自得自證誠實之語。推己之驗。以及人也。豈虛言哉。諸經皆云。以無量珍寶布施。不及持經句偈之功者。蓋以珍寶住相布施。止是生人天中福報而已。若能持念如說而行。或於諸佛之道。一言

見諦。則心通神會。見謝疑亡。了物我於一如。徹古今於當念。則道成正道。覺齊佛覺矣。孰盛於此哉。儒豈不曰。爲其事而無其功者。髡未嘗覩也。以故始乎爲士。終乎爲聖人。語不云乎。學也祿在其中矣。易曰。積善之家。必有餘慶。書曰。作善降祥。此亦必然之理也。豈吾聖人妄以祿與慶祥誇示於人乎。或曰。誦經以獻鬼神者。彼將安用。余曰。子固未聞財施猶輕。法施最重。古人蓋有遠行臨別。不求珍寶。而乞一言以爲惠者。如晏子一言之諷。而齊侯省刑。景公一言之善。而熒惑退舍。吾聖人之門弟子。或問孝。或問仁。或問政。或問友。或問事君。或問爲邦。有得一言。長善救失。而終身爲君子者矣。此止終身治世之語耳。比之如來大慈法施誠諦之語。感通八部龍天。震動十方世界。或向一言之下。心地開明。一念之間。性天朗徹。高超三界。穎脫六塵。清涼身心。剪拂業累。契真達本。入聖超凡。得意生身。自然無礙。隨緣作主。遇緣卽宗。先得菩提。次行濟度。世間之法。復有過此者乎。一切鬼神。各欲解脫其趣。其於如來稱性實談。欣戴護持也宜矣。又況佛爲無上法王。金口所說聖教靈文。一誦之則爲法。

輪轉地。夜叉唱空報四天王。天王聞已。如是展轉。乃至梵天。通幽通明。龍神悅懌。猶若綸言。誕布詔令。橫流寰宇之間。孰不欽奉。又況佛爲四生慈父。如父命其子。奚忍不從。誦經之功。其旨如此。教中云。若能七日七夜。心不散亂者。隨其所作。定有感應。若形留神往。外寂中搖。則尋行數墨而已。何異春禽晝啼。秋蟲夜鳴。雖百萬徧。果何益哉。余謂耿恭拜井而出泉。魯陽揮戈而駐日。誠之所感。只在須臾。七日之期。尙爲差遠。十千之魚。得聞佛號。而爲十千天子。五百之蝠。因樂法音。而爲五百聖賢。蟒因修懺而生天。龍聞說法而悟道。古人豈欺我哉。三藏教乘者。權教也。實際理地者。唯此一事實也。唯佛世尊。是究竟法。而一切法者。爲衆生設也。今不藉權教啓迪。初機而遽欲臻實際理地者。不亦見彈而思鴉炙乎。此善惠大士所謂渡河須用筏。到岸不須船也。其不然乎。佛法化度世間。皎如青天白日。而迷者不信。是猶盲人不見日月也。豈日月之咎哉。但隨機演說。方便多門。未易究耳。學者如人習射。久久方中。棗柏大士云。存修卻敗。放逸全乖。急亦不成。緩亦不得。但知不休。必不虛棄。又白樂天

問寬禪師。無修無證。何異凡夫。師曰。凡夫無明。二乘執著。離此二病。是曰真修。真修者。不得勤。不得忘。勤則近執著。忘則落無明。此爲心要耳。此真初學入道之法門也。或謂佛教有施食眞言。能變少爲多。如七粒徧十方之語。豈有是理。余曰不然。子豈不聞勾踐一器之醪。而衆軍皆醉。爨巴一罍之酒。而蜀川爲雨。心靈所至。而無感不通。況託諸佛廣大願力。廓其善心。變少爲多。何疑之有。妙哉佛之知見。廣大深遠。具六神通。唯其具宿命通。則一念超入於多劫。唯其具天眼通。則一瞬徧周於沙界。且如阿那律小果聲聞爾。唯具天眼一通。尙能觀大千世界。如觀掌中。況佛具眞天眼乎。舍利弗亦小果聲聞爾。於弟子中。但稱智慧第一。尙能觀人根器。至八千大劫。況佛具正徧知乎。唯其知見廣大深遠。則說法亦廣大深遠矣。又豈凡夫思慮之所能及哉。試以小喻大。均是人也。有大聰明者。有極愚魯者。大聰明者。於上古興亡治亂之跡。六經子史之論。事皆能知。至於海外之國。雖不及到。亦可觀書以知之。極愚魯者。誠不知也。又安可以彼知者爲誕也。一自佛法入此之後。間有聖人出現。流通輔

翼。試撫衆人耳目之所聞見者論之。如觀音菩薩。示現於唐文宗朝。泗洲大聖。出現於唐高宗朝。婺州義烏縣傅大士。齊建武四年丁丑五月八日生。時有天竺僧嵩頭。隨來謂曰。我昔與汝毗婆尸佛所。同發誓願。今兜率天宮衣鉢現在。何日當還。命大士臨水觀形。見有圓光寶蓋。大士曰。度生爲急。何思彼樂乎。行道之時。常見釋迦金粟定光三如來。放光襲其體。虢州閿鄉張萬回法雲公者。生於唐貞觀六年五月五日。有兄萬年。久征遼左。相去萬里。母程氏思其信音。公早晨告母而往。至暮持書而還。豐干禪師。居常騎虎出入。寒山拾得。爲之執侍。明州奉化布袋和尚。坐亡於嶽林寺。而復現於他州。宋太始初。誌公禪師。乃金城宋氏之子。數日不食。無饑容。語多靈應。晉石勒時。佛圖澄。掌中照映千里。鎮州普化。臨終之時。搖鈴騰空而去。五臺鄧隱峯。遇官兵與吳元濟交戰。飛錫乘空而過。兩軍遂解。嵩嶽帝受戒法於元珪禪師。仰山小釋迦。有羅漢來參。并授二王戒法。破竈墮之類。皆能證果鬼神。達磨大師。一百五十餘歲。滅於後魏。孝明帝太和十九年。葬於熊耳山。後三歲。魏宋雲奉使西域回。

遇於葱嶺。攜一革履歸西而去。後孝莊聞奏。啓墳觀之。果只一履存焉。文殊師利佛滅度後四百年。猶在人間。天台南嶽。羅漢所居。應供人天。屢顯聖跡。汀州南安巖主。靈異頗多。潭州華林善覺禪師。武甯新興嚴陽尊者。俱以虎爲侍從。道宣律師持律精嚴。感毗沙門天王之子爲護戒神。借得天上佛牙。今在人間。徽宗皇帝初登極時。因取觀之。舍利隔水晶匣。落如雨點。故太平盛典。有御製頌云。大士釋迦文。虛空等一塵。有求皆感應。無刹不分身。玉瑩千輪皎。金剛百煉新。我今恭敬禮。普願濟羣倫。皇帝知余好佛。而嘗爲余親言其事。如前所撫諸菩薩聖人。皆學佛者也。余所謂若使佛有纖毫妄心。則安能攝伏於具神通聖人也。釋有如彌天道安。東林慧遠。生肇融睿。陳慧榮。隋法顯。梁法雲。智文之徒。皆日記數萬言。講則天華墜席。頌石點頭。亦豈常人哉。如李長者。龐居士。非聖人之徒歟。孫思邈。寫華嚴經。又請僧誦法華經。呂洞賓參禪設供。彼神仙也。豈肯妄爲無益之事乎。況茲凡夫。敢恣毀斥。但佛之言。表事表理。有實有權。或半或滿。設漸設頓。各有攸當。苟非具大信根。未能無惑。亦猶吾

儒所謂子不語怪力亂神。而春秋石言于晉。神降於莘。易曰。見豕負塗。載鬼一車。此非神怪而何。孟子不言利。而曰善教得民財。於宋受兼金。此非利而何。蓋聖人之言。從權適變。有反常而合道者。又安可以前後異同之言議聖人也。諸同志者。幸於佛祖之言。詳披諦信。真積力久。自當證之。方驗不誣。天下人非之。而吾欲正之。正如孟子所謂一薛居州。獨如宋王何。余豈有他哉。但欲以公滅私。使一切人以難得之身。知有無上菩提。各識自家寶藏。狂情自歇。而勝淨明心。不從人得也。吾何畏彼哉。晉惠帝時。王浮僞作化胡經。蓋不知佛生於周昭王二十四年。滅於穆王五十二年。歷恭懿孝夷厲宣幽平桓莊僖惠襄頃匡定一十六王。滅後三百四十二年。至定王三年。方生老子。過流沙時。佛法遐被五天竺。及諸鄰國。著聞天下。已三百餘年矣。何待老子化胡哉。呂夏卿序八師經曰。小人不知刑獄之畏。而畏地獄之慘。雖生得以欺於世。死亦不免於地下矣。今有人焉。姦雄氣餒。足以塗炭於人。而反不敢爲者。以有地獄報應不可逃也。若使天下之人。事無大小。以有因果之故。皆不敢自欺其心。善

護衆生之念。各無侵凌爭奪之風。則豈不刑措而爲極治之世乎。謂佛無益於天下者。吾不信矣。諒哉。人天路上。以福爲先。生死海中。修道是急。今有欲快樂人天。而不植福。出離生死。而不明道。是猶鳥無翼而欲飛。木無根而欲茂。奚可得哉。古今受五福者。非善報而何。嬰六極者。非惡報而何。此皆過去所修。而於今受報。甯不信哉。或云。天堂是妄造。地獄非眞說者。何愚如此。佛言六道。而人天鬼畜。灼然可知。四者旣已明矣。唯修羅地獄二道。但非凡夫肉眼可見耳。豈虛也哉。只如神怪之事。何世無之。亦涉史傳之載錄。豈無耳目之聞見。雖愚者亦知其有矣。人多信於此。而疑於彼者。是猶終日數十。而不知二五也。可謂賢乎。曾有同僚謂余曰。佛之戒人。不食肉味。不亦迂乎。試與公詳論之。雞之司晨。貓之捕鼠。牛之力田。馬之代步。犬之司禦。不殺可也。如豬羊鵝鴨水族之類。本只供庖廚之物。苟爲不殺。則繁植爲害。將安用哉。余曰。不然。子未知佛理者也。吾當爲子言其涯略。章明較著。善惡報應。唯佛以眞天眼。宿命通。故能知之。今惡道不休。三塗長沸。良有以也。一切衆生。遞相吞噉。昔相負而

冥相償。豈不然乎。且有大量衆生。如鯨鼈師象。巴蛇鯤鵬之類。是也。細身衆生。如蚊蚋蟻蝻。蚤蟲之類。是也。品類巨細雖殊。均具一性也。人雖最靈。亦只別爲一類耳。儻不能積善明德。識心見道。矻矻然以嗜慾爲務。成就種種惡業習氣。於倏爾三二十年之間。則與彼何異哉。且迦樓羅王展翅。闊三百三十六萬里。阿修羅王身長八萬四千由旬。以彼觀之。則此又不直毫末耳。安可以謀畫之差。大心識之最靈。欺他類之眇小不靈。而恣行殺戮哉。只如世間牢獄。唯治有罪之人。其無事者。自不與焉。智者終不曰建立都縣。設官置局。不可閑冷。卻須作一兩段事。往彼相共鬧熱也。今雖衆生無盡。惡道茫茫。若無怨對。卽自解脫。復何疑哉。若有專切修行。決欲疾得阿耨菩提者。更食衆生血肉。無有是處。唯富貴之人。宰制邦邑者。又須通一線道。昔陸亘大夫問南泉云。弟子食肉。則是不食。則食。南泉曰。食是大夫祿。不食是大夫福。又宋文帝謂求那跋摩曰。孤媿身徇國事。雖欲齋戒不殺。安可得如法也。跋摩曰。帝王與匹夫所修當異。帝王者。但正其出言發令。使人神悅和。人神悅和。則風雨順時。

風雨順時則萬物遂其所生也。以此持齋。齋亦至矣。以此不殺。德亦大矣。何必輟半日之餐。全一禽之命乎。帝撫几稱之曰。俗迷遠理。僧滯近教。若公之言。真所謂天下之達道。可以論天人之際矣。由是論之。帝王公侯。有大恩德。陶鑄天下者。則可矣。士庶之家。春秋祭祀。用之以時者。尙可懺悔。圓顛方服者。承佛戒律。受人信施。而反例塵俗。飲酒食肉。非特取侮於人。而速戾於天。亦袈裟下失人身者。是爲最苦。忍不念哉。吾儒則不斷殺生。不戒酒肉。於盜則但言慢藏誨盜而已。於淫則但言未見好德如好色而已。安能使人不犯哉。佛之爲教。則彰善癉惡。深切著明。顯果報。說地獄。極峻至嚴。而諛誑強暴者。尙不悛心。況無以警之乎。然五戒但律身之麤跡。修行之初步。若升高必自下。若陟遐必自邇。求道證聖之人。亦未始不由此道入也。至於亡思慮。泯善惡。融真妄。一聖凡。單傳密印之道。又非可以紙墨形容。而口舌辯也。文章蓋世。止是虛名。勢望驚天。但增業習。若比以定慧之法。治本有之神明。爲過量人。超出三界。則孰多於此哉。士農工商。各分其業。貧富壽夭。自出前定。佛法雖亡。於我何益。

佛法雖存於我何損。功名財祿本繫乎命。非由謗佛而得。榮貴利達亦在乎時。非由斥佛而致。一時之間操不善心。妄爲口禍。非唯無益。當如後患。何智者慎之。狂者縱之。六道報應。勝劣所以分也。余非佞也。願偕諸有志者。背塵合覺。同底於道。不亦盡善盡美乎。或有闡提之性。根於心者。必不取於是說。余無恤焉。

附錄 牟融理惑論

問曰。何以正言佛。佛何謂也。牟子曰。佛乃道德之元祖。神明之宗緒。佛之言覺也。恍惚變化。分身散體。能圓能方。或小或巨。成隱或彰。蹈火不燒。履刃不傷。在汙不染。在禍無殃。欲行則飛。坐則揚光。故號爲佛。問曰。何以謂之道。道何類也。牟子曰。道之言導也。導人致於無爲。牽之無前。引之無後。舉之無上。抑之無下。視之無形。聽之無聲。四表爲大。宛延其外。毫釐爲細。閒關其內。故謂之道。問曰。佛言人死當復更生。僕不信此言也。牟子曰。身譬五穀之根葉。魂神五穀之種實。根葉生必當死。種實豈有終亡。問曰。佛道崇無爲。樂施與。持戒兢兢。今沙門耽好酒漿。或畜妻子。取賤賣貴。專行

詐給。此得謂之無爲耶。牟子曰。工輪能與人斧斤繩墨。而不能使人巧。聖人能授人
道。不能使人履而行之。皋陶能罪盜人。不能使貪夫爲夷齊。五刑能誅無狀。不能使
惡人爲曾閔。堯不能化丹朱。周公不能訓管蔡。豈唐教之不著。周道之不備哉。然無
如惡人何也。問曰。吾子之說。其辭富。其文熾。是子之辨也。牟子曰。非辨也。見博故不
惑耳。問曰。見博亦有術乎。牟子曰。由佛經也。吾未解佛經之時。惑甚於子。雖誦五經。
適以爲華。未成實矣。吾既觀佛經之說。覽老子之要。守恬淡之性。觀無爲之行。還視
世事。猶臨天井而闕溪谷。登嵩岱而見邱垤矣。問曰。吾昔在京師。入東觀。游太學。視
俊士之所規。聽儒林之所論。未聞修佛道以爲貴。自損容以爲上也。吾子曷爲眈之
哉。牟子曰。老子曰。名者身之害。利者行之穢。赴趣閒隙。務合當世。此下士之所行。中
士之所廢也。況至道之蕩蕩。上聖之所行乎。杳兮如天。淵兮如海。不合闕墻之士。數
仞之夫。固其宜也。彼見其門。我覩其室。彼采其華。我取其實。彼求其備。
速改路。吾請履之。論凡三十七條。其大指如此。



佛學書局新出版

普 及 佛 本 經

目 次

圓覺了義經	普及本定價六分	毛邊紙中裝價九分
梵網經	普及本定價一角	毛邊紙中裝一角半
佛遺教經	普及本定價四分	毛邊紙中裝價七分
四十二章經	普及本定價四分	
八大人覺經	普及本定價四分	
般若心經	普及本定價四分	
金剛經	普及本定價四分	毛邊紙本定價七分
無量壽經	普及本定價八分	毛邊紙本一角二分
觀無量壽經	普及本定價四分	毛邊紙本定價七分
維摩詰經	普及本一角二分	毛邊紙本一角八分
楞嚴經	普及本定價三角	毛邊紙本四角五分
楞伽經	普及本二角二分	毛邊紙本定價三角
妙法蓮華經	普及本定價四角	毛邊紙本定價六角
阿彌陀經	普及本價二分半	毛邊紙本定價四分
稱讚淨土佛攝受經	普及本價二分半	毛邊紙本定價四分
阿彌陀經二譯	普及本定價四分	毛邊紙本定價七分
地藏本願經	普及本定價八分	毛邊紙本一角二分
優婆塞戒經	普及本定價二角	毛邊紙本定價三角

二經
同本

三經
同本

—— 尚 有 數 十 種 在 正 排 印 中 ——

中華民國廿四年拾月拾五日收發



護 法 論

全 一 冊

中華民國二十四年五月印行

◎每冊定價大洋肆分

(外埠酌加郵匯費)

著 述 者 「宋」張商英居士

出 版 者 佛學書局 表代 沈彬翰

上海新大沽路口 電話三三七四三

印 刷 者 國 光 印 書 局

愚園路一五四號 電話三五五二四

總發行所 上海佛學書局

分發行所 佛學書局分局

(一)上海特設路
(二)上海新開路
(三)上海南京路
(四)上海中平路
(五)上海北長街
(六)上海西東玉泉街
(七)上海南七書局
(八)上海北平西湖北平東玉泉街南七書局

分銷處 各埠佛經流通處

.92
=3